

四庫全書

集部

欽定四庫全書

集部

御定全唐詩錄卷六十四

五

詳校官左中允_臣瑋五珠

主事銜_臣徐以坤覆勘

總校官原任中允_臣王燕緒

校對官中書_臣田尹衡

謄錄監生_臣龐兆懋

欽定四庫全書

御定全唐詩錄卷六十四

白居易_七

近體詩二

送王十八歸山寄題仙遊寺

曾於太白峰前住數到仙遊寺裏來
黑水澄時潭底出白雲破處洞門開
林間暖酒燒紅葉石上題詩掃綠苔
惆悵舊遊無復到菊花時節羨君迴

八月十五日夜禁中獨直對月憶元九

銀臺金闕夕沈沈，獨宿相思在翰林。
三五夜中新月色，二千里外故人心。
渚宮東面煙波冷，浴殿西頭鐘漏深。
猶恐清光不同見，江陵卑濕足秋陰。

八月十五日夜聞崔大員外翰林獨直對酒翫月

因懷禁中清景偶題是詩

秋月空懸高碧外，仙郎靜翫禁闈間。
歲中惟有今宵好，海內無如此地閒。
皓色分明雙闕勝，清光深到九門關。

遙聞獨醉還惆悵不見金波照玉山

和元微之南秦雪

往歲曾為西邑吏慣從駱口到南秦
三時雲令多飛雪二月山寒少有春
我思舊事猶惆悵君作初行定苦辛
仍賴愁猿寒不叫若聞猿叫更愁人

和元九與呂二同宿話舊感贈

見君新贈呂君詩憶得同年行樂時
爭入杏園齊馬首潛過柳曲鬪蛾眉
八人雲散俱遊宦七度花開盡別離

聞道秋娘猶且在至今時復問微之

欲與元八卜鄰先有是贈

平生心迹最相親欲隱牆東不為身明月好同三徑夜
綠楊宜作兩家春每因暫出猶思伴豈得安居不擇鄰
何獨終身數相見子孫長作隔牆人

廣宣上人以應制詩見示因以贈之詔許上人居
安國寺紅樓院以詩供奉

道林談論惠休詩一到人天便作師香積筵承紫泥詔

昭陽歌唱碧雲詞
紅樓許住請銀鑰
翠輦陪行蹋玉墀
惆悵甘泉曾侍從
與君前後不同時

重傷小女子

學人言語凭牀行
嫩似花房脆似瓊
纔知恩愛迎三歲
未辨東西過一生
汝異下殤應殺禮
吾非上聖詎忘情
傷心自歎鳩巢拙
長墮春雛養不成

過顏處士墓

向墳通徑沒荒榛
滿室詩書積閣塵
長夜肯教黃壤曉

悲風不許白楊春
簞瓢顏子生仍促
布被黔婁死更貧
未會悠悠上天意
惜將富壽與何人

贈楊秘書巨源

楊嘗有贈洺州詩曰三刀夢
益州一箭取遼城由是得名

早聞二箭取遼城
相識雖新有故情
清句三朝誰是敵
白鬚四海半為兄
貧家雜草時時入
瘦馬尋花處處行
不用更教詩過好
折君官職是聲名

微之到通州日授館未安見塵壁間有數行字讀
之即僕舊詩其落句云綠水紅蓮一朵開千花

百草無顏色然不知題者何人也微之吟歎不足因綴一章兼錄僕詩本同寄省其詩乃是十五年前初及第時贈長安妓人阿軟絕句緬思往事杳若夢中懷舊感今因酬長句

十五年前似夢遊曾將詩句結風流偶助笑歌嘲阿軟可知傳誦到通州昔教紅袖佳人唱今遣青衫司馬愁惆悵又聞題處所雨淋江館破牆頭

得微之到官後書備知通州之事悵然有感因成

四章

選二首

來書仔細說通州州在山根峽岼頭四面千重火雲合
中心一道瘴江流蟲蛇白晝攔官道蚊蚋黃昏撲郡樓
何罪遣君居此地天高無處問來由

匱匪巔山萬仞餘人家應似甌中居寅年籬下多逢虎
亥日沙頭始賣魚衣斑梅雨長須熨米澀畚田不解鉏
努力安心過三考已曾愁殺李尚書

李實尚書先貶此州身歿于彼處

白口阻風十日

洪濤白浪塞江津處處迴事事逃世上方為失途客
江頭又作阻風人魚蝦遇雨腥盈鼻蚊蚋和煙癢滿身
老大光陰能幾日等閒曰口坐經旬

盧侍御與崔評事為予於黃鶴樓置宴宴罷同望
江邊黃鶴古時樓勞置華筵待我遊楚思嶽茫雲水冷
商聲清脆管絃秋白花浪濺頭陀寺紅葉林籠鸚鵡洲
總是平生未行處醉來堪賞醒堪愁

舟行阻風寄李十一舍人

扁舟厭泊煙波上，輕策閒尋浦嶼間。
虎蹋青泥稠似印，風吹白浪大於山。
且愁江郡何時到，敢望京都幾歲還。
今日料君朝退後，迎寒新耐煖開顏。

李好小耐酒故云

題王處士郊居

半依雲渚半依山，愛此令人不欲還。
負郭田園八九頃，向陽茅屋兩三間。
寒松縱老風標在，野鶴雖饑飲啄閒。
一卧江邨來早晚，著書盈帙鬢毛斑。

放言五首并序

元九在江陵時有放言詩五首韻高而體律意古而詞新予每詠之甚覺有味雖前輩深於詩者未有此作唯李頎有云濟水至清河自濁周公大聖接輿狂斯句近之矣予出佐潯陽未屆所任舟中多暇又江上獨吟因綴五篇以續其意耳

朝真暮偽何人辨古往今來底事無但愛莊生能詐聖可知甯子解佯愚草螢有耀終非火荷露雖團豈是珠

不取燔柴兼照乘可憐光彩亦何殊

世途倚伏都無定塵網牽纏卒未休禍福迴還車轉轂
榮枯反覆手戲鉤龜靈未免剗腸患馬失應無折足憂
不信君看奕棋者輸贏須待局終頭

贈君一法決狐疑不用鑽龜與祝著試玉要燒三日滿

真玉燒三日不熟

辨材須待七年期

豫章木生七年而後知

周公恐懼流

言日王莽謙恭未篡時向使當時身便死一生真偽復

誰知

誰家第宅成還破何處親賓哭復歌昨日屋頭堪炙手
今朝門外好張羅北邙未省留閒地東海何曾有定波
莫笑賤貧誇富貴共成枯骨兩如何

泰山不要欺毫末顏子無心羨老彭松樹千年終是朽
槿花一日自為榮何須戀世常憂死亦莫嫌身漫厭生
生去死來都是幻幻人哀樂繫何情

獨樹浦雨夜寄李六郎中

忽憶兩家同里巷何曾一處不追隨閒遊預算分朝日

靜語多同待漏時
花下放狂衝黑飲
燈前起坐徹明棋
可知風雨孤舟夜
蘆葦叢中作此詩

初到江州

潯陽欲到思無窮
庾亮樓南湓口東
樹木凋疎山雨後
人家低濕水煙中
菰蔣餽馬行無力
蘆荻編房臥有風
遙見朱輪來郭外
相迎勞動使君公

庾樓曉望

獨憑朱檻立
凌晨山色初明
水色新竹霧曉
籠銜嶺月

蘋風送暖過江春
子城陰處猶殘雪
衙鼓聲前未有塵
三百年來庾樓上
曾經多少望鄉人

北亭招客

疎散郡丞同野客
幽閒官舍抵山家
春風北戶千莖竹
晚日東園一樹花
小盞吹醅嘗冷酒
深爐敲火炙新茶
能來盡日觀碁否
太守知慵放晚衙

送客之湖南

年年漸見南方物
事事堪傷北客情
山鬼趨丘妖切跳惟

一足峽猿哀怨過三聲帆開青草湖中去衣溼黃梅雨
裏行別後雙魚難定寄近來潮不到湓城

香爐峰下新卜山居草堂初成偶題東壁

五架三間新草堂石階桂柱竹編牆南簷納日冬天暖
北戶迎風夏月涼灑砌飛泉纔有點拂窓斜竹不成行
來春更葺東廂屋紙閣蘆簾著孟光

長松樹下小溪頭斑鹿胎巾白布裘藥圃茶園為產業
野麋林鶴是交遊雲生澗戶衣裳潤嵐隱山厨火燭幽

最愛一泉新引得清泠屈曲遶階流

日高睡足猶慵起小閣重裘不怕寒遺愛寺泉歌枕聽
香爐峰雪撥簾看匡廬便是逃名地司馬仍為送老官
心泰身寧是歸處故鄉何獨在長安

編集拙詩成一十五卷因題卷末戲贈元九李二

十

一篇長恨有風情十首秦吟近正聲每被老元偷格律

元九向江陵日常以拙苦教短李伏歌行李二十常自
詩一軸贈行自後格變

負歌行近見

予樂府五十世間富貴應無分身後文章合有名莫怪
首默然心伏氣粗言語大新排十五卷詩成

尋郭道士不遇

郡中乞假來相訪洞裏朝元去不逢看院祇留雙白鶴
入門惟見一青松藥爐有火丹應伏雲碓無人水自舂
盧山中雲母多故以水碓擣鍊俗呼為雲碓
欲問叅同契中事更期何日得
從容

潯陽春

元和十二年作

春來

春來觸動故鄉情
忽見風光憶兩京
金谷蹋花香騎入
曲江碾草鈿車行
誰家綠酒歡連夜
何處紅樓睡失明
獨有不眠不醉客
經春冷坐古湓城

春去

一從澤畔為遷客
兩度江頭送暮春
白髮更添今日鬢
青衫不改去年身
百川未有回流水
一老終無却少人
四十六時三月盡
送春爭得不殷勤

聞楊十二新拜省郎遙以詩賀

文昌新入有光輝
紫界宮牆白粉闌
曉日雞人傳漏箭
春風侍女護朝衣
雪飄歌曲高難和
鶴拂煙霄老慣飛
官職聲名俱入手
近來詩客似君稀

頃曾有贈楊詩落句云不用更教詩

過好折君官職是
聲名故云俱入手

題岳陽樓

岳陽城下水漫漫
獨上危樓凭曲欄
春岼綠時連夢澤
夕波紅處近長安
猿攀樹立啼何苦
雁點湖飛渡亦難

此地惟堪圖畫障華堂張與貴人看

入峽次巴東

不知遠郡何時到猶喜全家此去同
萬里王程三峽外百年生計一舟中
巫山暮足霑花雨隴水春多逆浪風
兩片紅旌數聲鼓使君艤牒上巴東

初到忠州贈李六

好在天涯李使君江頭相見日黃昏
吏人生硬都如鹿市井蕭疎只抵邨
一隻蘭船當驛路百層石磴上州門

更無平地堪行處，虛受朱輪五馬恩。

重寄荔枝與楊使君，時聞楊使君欲種植，故有落

句戲之

摘來正帶凌晨露，寄去須憑下水船。映我緋衫渾不見，
對公銀印最相鮮。香連翠葉真堪畫，紅透青籠實可憐。
聞道萬州方欲種，愁君得喫是何年。

送蕭處士遊黔南

能文好飲老蕭郎，身似浮雲鬢似霜。生計拋來詩是業，

家園忘却酒為鄉
江從巴峽初成字
猿過巫陽始斷腸
不醉黔中爭去得
磨圍山月正蒼蒼

冬至夜

老去襟懷常濩落
病來鬚鬢轉蒼浪
心灰不及爐中火
鬚雪多於砌下霜
三峽南賓城最遠
一年冬至夜偏長
今宵始覺房櫳冷
坐索寒衣託孟光

春至

若為南國春還至
爭向東樓日又長
白片落梅浮澗水

黃梢新柳出城墻間拈蕉葉題詩詠悶取藤枝引酒嘗
樂事漸無身漸老從今始擬負風光

房家夜宴喜雪戲贈主人

風頭向夜利如刀賴此溫爐軟錦袍
桑落氣熏珠翠暖
柘枝聲引管絃高酒鉤送盞推蓮子
燭淚粘盤壘蒲萄
不醉遣儂爭散得門前雪片似鵝毛

舟中晚起

日高猶掩水窓眠枕簟清涼八月天
泊處或依沽酒店

宿時多伴釣魚船
退身江海應無用
憂國朝廷自有賢
且向錢塘湖上去
冷吟閒醉二三年

東院

松下軒廊竹下房
暖簷晴日滿繩床
淨名居士經三卷
榮啟先生琴一張
老去齒衰嫌橘醋
病來肺渴覺茶香
有時閒酌無人伴
獨自騰騰入醉鄉

臘後歲前遇景詠意

海梅半白柳微黃
凍水初融日欲長
度臘都無苦霜霰

迎春先有好風光
郡中起晚聽衙鼓
城上行慵倚女牆
公事漸閒身且健
使君殊未厭餘杭

餘杭形勝

餘杭形勝四方無
州傍青山縣枕湖
遶郭荷花三十里
拂城松樹一千株
夢兒亭古傳名謝
教伎樓新道姓蘇

州西靈隱山上有夢謝亭即杜明甫夢謝靈
運之所因名客兒亭蘇小小本錢塘人也

獨有使君

年太老風光不稱白髭鬚

江樓夕望招客

海天東望夕茫茫山勢川形濶復長燈火萬家城四畔
星河一道水中央風吹古木晴天雨月照平沙夏夜霜
能就江頭銷暑否比君茅舍校清涼

江樓晚眺景物鮮奇吟玩成篇寄水部張員外

澹煙疎雨間斜陽江色澄鮮海氣涼蜃散雲收破樓閣
虹殘水照斷橋梁風翻白浪花千片雁點青天字一行
好著丹青圖寫取題詩寄與水曹郎

得湖州崔十八使君喜與杭越隣郡因成長句代

賀兼寄微之

三郡何因結此緣
貞元科第忝同年
故情歡喜開書後
舊事思量在眼前
越國封疆吞碧海
杭城樓閣入青煙
吳興卑小君應屈
為是蓬萊最後仙

夜歸

半醉閒行湖岼東
馬鞭敲鐙響瓏璁
萬株松樹青山上
十里沙隄明月中
樓角漸移當路影
潮頭欲過滿江風
歸來未放笙歌散
畫戟門開蠟燭紅

和薛秀才尋梅花同飲見贈

忽驚林下發寒梅便試花前飲冷杯白馬走迎詩客去
紅筵鋪待舞人來歌聲怨處微微落酒氣醺時旋旋開
若到歲寒無雨雪猶應醉得兩三迴

錢塘湖春行

孤山寺北賈亭西水面初平雲脚低幾處早鶯爭暖樹
誰家新燕啄春泥亂花漸欲迷人眼淺草纔能沒馬蹄
最愛湖東行不足綠楊陰裏白沙隄

西湖晚歸回望孤山寺贈諸客

柳湖松島蓮花寺晚動歸橈出道場
盧橘子低山雨重
棕櫚葉戰水風涼
煙波澹蕩搖空碧
樓殿參差倚夕陽
到岼請君回首望
蓬萊宮在海中央

杭州春望

望海樓明照曙霞
城東樓名望海樓
護江堤白蹋晴沙
濤聲夜

入伍負廟柳色春
藏蘇小家紅袖
織綾誇柿蒂
杭州出柿蒂花

者尤佳也
青旗沽酒趁梨花
其俗釀酒趁梨花時熟號為梨花春
誰開湖寺西

南路草綠裙腰一道斜

孤山寺路在湖之中
草綠時望如裙帶

湖上醉中代諸妓寄嚴郎中

笙歌杯酒正歡娛，忽憶仙郎望帝都。
借問連宵直南省，何如盡日醉西湖。
蛾眉別久心知否，雞舌含多口厭無。
還有些些惆悵事，春來山路見蘼蕪。

湖上招客送春汎舟

欲送殘春招酒伴，客中誰最有風情。
兩瓶箬下新開得，一曲霓裳初教成。

時崔湖州寄新箬下酒來
樂妓按霓裳羽衣曲初畢排比管絃

行翠袖指麾船舫點紅旌慢牽好向湖心去恰是菱花
鏡上行

答微之誇越州州宅

賀上人回得報書大誇州宅似仙居厭看馮翊風沙久
喜見蘭亭煙景初日出旌旗生氣色月明樓閣在空虛
知君閣數江南郡除却餘杭盡不如

微之重誇州居其落句有西州羅刹之謔因嘲茲
石聊以寄懷

君問西州城下事醉中疊紙為君書嵌空石面標羅刹
壓捺潮頭敵子胥神鬼曾鞭猶不動波濤雖打欲何如
誰知太守心相似抵滯堅頑兩有餘

張十八負外以新詩二十五首見寄郡樓月下吟
翫通夕因題卷後封寄微之

秦城南省清秋夜江郡東樓明月時去我三千六百里
得君二十五篇詩陽春曲調高難和淡水交情老始知
坐到天明吟未足重封轉寄與微之

酬微之

微之題云郡務稍簡因得整集舊詩并連綴刪削封章諫草繁委籍笥僅踰百軸偶

成自嘆兼寄樂天

滿篋填箱唱和詩少年為戲老成悲聲聲麗曲敲寒玉

句句妍辭綴色絲吟玩獨當明月夜傷嗟同是白頭時

由來才命相磨折天遣無兒欲怨誰

微之句云天遣兩家無嗣子欲將文

字付誰人故以此答之

春題湖上

湖上春來似畫圖亂峰圍繞水平鋪松排山面千重翠

月點波心一顆珠
碧毯線頭抽
早稻青羅裙
帶展新蒲
未能拋得杭州去
一半勾留是此湖

早春憶微之

昏昏老與病相和
感物思君歎復歌
聲早雞先知夜短
色濃柳最占春多
沙頭雨染斑斑草
水面風驅瑟瑟波
可道眼前光景惡
其如難見故人何

西湖留別

征途行色慘風煙
祖帳離聲咽管絃
翠黛不須留五馬

皇恩只許住三年綠藤陰下鋪歌席紅藕花中泊妓船
處處回頭盡堪戀就中難別是湖邊

答客問杭州

為我踟躕停酒盞與君約畧說杭州山名天竺堆青黛
湖號錢塘瀉綠油大屋簷多裝鴈齒小航船亦畫龍頭
所嗟水路無三百官繫何因得再遊

歲日家宴戲示弟姪等兼呈張侍御二十八丈殷

判官二十三兄

弟妹妻孥小姪甥嬌癡弄我助歡情
歲盞後推藍尾酒
春盤先勸膠牙錫形骸潦倒雖堪歎
骨肉團圓亦可榮
猶有誇張少年處
笑呼張丈喚殷兄

正月三日閒行

黃鸝巷口鶯初語
烏鵲河頭冰欲消
黃鸝坊名
烏鵲河名
綠浪東

西南北水紅欄三百九十橋
蘇之官橋大數
鴛鴦蕩漾雙雙翅

楊柳交加萬萬條
借問春風來早晚
只從前日到今朝

夜聞賈常州崔湖州茶山境會想羨歡宴因寄此

詩

遙聞境會茶山夜，珠翠歌鐘俱遠身。
盤下中分兩州界，燈前合作一家春。
青娥遞舞應爭妙，紫筍齊嘗各鬪新。
自歎花時北窓下，蒲黃酒對病眠人。

時馬陞損腰
正勸蒲黃酒

病中多雨逢寒食

水國多陰常嬾出，老夫饒病愛閒眠。
三旬卧度鶯花月，一半春銷風雨天。
薄暮何人吹感策，新晴幾處縛鞦韆。
綵繩芳樹長如舊，惟是年年換少年。

重答劉和州

來篇云蘇州刺史劍能詩西掖吟來替左司又云若共吳王鬪百草不如

惟是欠西施

分無佳麗敵西施敢有文章替左司隨分笙歌聊自樂

等閒篇詠被人知花邊妓引尋香徑月下僧留宿劍池

可惜當時好風景吳王應不解吟詩

採香徑在館娃宮

城上夜宴

留春不住登城望惜夜將來秉燭遊風月萬家河兩岬
笙歌一曲郡西樓詩聽越客吟何苦酒被吳娃勸不休

從道人生都是夢夢中歡笑亦勝愁

詠懷

蘇杭自昔稱名郡牧守當今當好官
兩地江山蹋得遍五年風月詠將殘
幾時酒盞曾拋却何處花枝不把看
白髮滿頭歸得也詩情酒興漸闌珊

宿靈巖寺上院

高高白月上青林客去僧歸獨夜深
葦血屏除惟對酒歌鐘放散只留琴
更無俗物當人眼但有泉聲洗我心

最愛曉亭東望好太湖煙水綠沈沈

自喜

自喜天教我少緣家徒行計兩翩翩身無妻子都三口
鶴與琴書共一船僮僕減來無冗食資糧算外有餘錢
攜將貯作丘中費猶免饑寒得數年

武丘寺路宴留別諸妓

一作張籍詩

銀泥裙映錦障泥畫舸停橈馬簇蹄清管曲終鸚鵡語
紅旗影動馱蒲撥切鞦河中切嘶漸消醉色朱顏淺欲語

離情翠黛低莫忘使君吟咏處女墳湖北武丘西

和楊郎中賀楊僕射致仕後楊侍郎門生合宴席

上作

業重關西繼大名恩深闕下遂高情祥鱣降伴趨庭鯉
賀燕飛和出谷鶯范蠡舟中無子弟疏家席上欠門生
可憐玉樹連桃李從古無如此會榮

寄殷協律

多叙江南舊遊

五歲優游同過日一朝消散似浮雲琴詩酒伴皆拋我

雪月花時最憶君，幾度聽雞歌白日。亦曾騎馬詠紅裙。

予在杭州日有歌云：聽唱黃雞與白日，又有詩云：著紅騎馬是何人。吳姬暮雨蕭蕭曲自

別江南更不聞。

江南吳二娘曲詞云：暮雨蕭蕭郎不歸。

送鶴與裴相臨別贈詩

司空愛爾爾須知，不信聽吟送鶴詩。羽翮勢高寧惜別，稻梁恩厚莫愁饑。夜棲少共雞爭樹，曉浴先饒鳳占池。穩上青雲勿回顧，的應勝在白家時。

病假中龐少尹攜魚相過

宦情牢落年將暮，病假聯緜日漸深。
被老相催雖白首，與春無分未甘心。
閒停茶椀從容語，醉把花枝取次吟。
勞動故人龐閣老，提魚攜酒遠相尋。

自題新昌居止因招楊郎中小飲

地偏坊遠巷仍斜，最近東頭是白家。
宿雨長齊隣舍柳，晴光照出夾城花。
春風小榼三升酒，寒食深爐一碗茶。
能到南園同醉否，笙歌隨分有些些。

戊申歲暮詠懷

窮冬月末兩三日半百年過六七時龍尾赴朝無氣力
牛頭叅道有心期榮華外物終須悟老病傷人豈得知
猶被妻兒教漸退莫求致仕且分司

惟生一女才十二祇欠三年未六旬婚嫁累輕何怕老
饑寒心慣不憂貧紫泥丹筆皆經手赤紱金章盡到身
更擬踟躕覓何事不歸嵩洛作閒人

問江南物

歸來未及問生涯先問江南物在耶引手摩挲青石笋

迴頭點檢白蓮花蘇州舫故龍頭閣王尹橋傾雁齒斜
別有夜深惆悵事月明雙鶴在裴家

過元家履信宅

雞犬喪家分散後林園失主寂寥時落花不語空辭樹
流水無情自入池風蕩醺船初破漏雨淋歌閣欲傾欵
前庭後院傷心事惟是春風秋月知

池上小宴問程秀才

洛下林園好自知江南景物闇相隨淨淘紅粒暑

鳥感切

香飯薄切紫鱗烹水葵雨滴蓬聲青雀舫浪搖花影白
蓮池停杯一問蘇州客何似吳松江上時

橋亭卯飲

卯時偶飲齋時卧林下高橋橋上亭松影過窓眠始覺
竹風吹面醉初醒就荷葉上包魚鮓當石渠中浸酒瓶
生計悠悠身兀兀甘從妻喚作劉伶

履道池上作

家池動作經旬別松竹琴魚好在無樹暗小巢藏巧婦

渠荒新葉長，慈姑不因車馬時。
時到豈覺林園日，日蕪猶喜春深。
公事少，每來花下得踟蹰。

池上閒詠

青莎臺上起書樓，綠藻潭中繫釣舟。
日晚愛行深竹裏，月明多上小橋頭。
暫嘗新酒還成醉，亦出中門便當遊。
一部清商聊送老，白鬚蕭颯管絃秋。

早春憶蘇州寄夢得

吳苑四時風景好，就中偏好是春天。
霞光曙後殷於火。

水色晴來嫩似煙，士女笙歌宜月下。使君金紫稱花前，
誠知歡樂堪留戀。其奈離鄉已四年。

送姚杭州赴任因思舊遊

與君細話杭州事，為我留心莫等閒。閭里固宜勤撫恤，
樓臺亦要數躋攀。笙歌縹緲虛空裏，風月依稀夢想間。
且喜詩人重管領，遙飛一盞賀江山。

渺渺錢塘路幾千，想君到後事依然。靜逢竺寺猿偷橘，
閒看蘇家女採蓮。故妓數人憑問訊，新詩兩首倩留傳。

舍人雖健無多興老校當時八九年

杭民呼余為白舍人

劉蘇州寄釀酒糯米李浙東寄楊柳枝舞衫偶因

嘗酒試衫輒成長句寄謝之

柳枝漫蹋試雙袖桑落初香嘗一杯金屑醅濃吳米釀
銀泥衫穩越娃裁舞時已覺愁眉展醉後仍教笑口開
慙愧故人憐寂寞三十里外寄歡來

早春憶遊思黯南莊因寄長句

南莊勝處心常憶借問軒車早晚遊美景難忘竹廊下

好風爭奈柳橋頭
冰消見水多於地
雪霽看山盡入樓
若待春深始同賞
鶯殘花落却堪愁

早夏曉興贈夢得

窓明簾薄透朝光
卧整巾簪起下牀
背壁燈殘經宿焰
開箱衣帶隔年香
無情亦任他春去
不醉爭銷得晝長
一部清商一壺酒
與君明日煖新堂

春盡日宴罷感事獨吟

開成五年三月三十日作

五年三月今朝盡
客散筵空獨掩扉
病共樂天相伴住

春隨樊子一時歸閒聽鶯語移時立思逐楊花觸處飛
金帶縋腰衫委地年年衰瘦不勝衣

在家出家

衣食支吾婚嫁畢從今家事不相仍夜眠身是投林鳥
朝飯心同乞食僧清唳數聲松下鶴寒光一點竹間燈
中宵入定跏趺坐女喚妻呼多不應

九江北岼遇風雨

黃梅縣邊黃梅雨白頭浪裏白頭翁九江濶處不見岼

五月盡時多惡風人間穩路應無限何事拋身在此中
十年三月三十日別微之於澧上十四年三月十
一日夜遇微之於峽中停舟夷陵三宿而別言
不盡者以詩終之因賦七言十七韻以贈且欲
記所遇之地與相見之時為他年會話張本也

澧水店頭春盡日送君上馬謫通川夷陵峽口明月夜
此處逢君是偶然一別五年方見面相攜三宿未迴船
坐從日暮惟長歎語到天明竟未眠齒髮蹉跎將五十

關河迢遞過三千生涯共寄滄江上鄉國俱拋白日邊
往事渺茫都是夢舊遊零落半歸泉醉悲灑淚春杯裏
吟苦支頤曉燭前莫問龍鍾惡官職且聽清脆好詩篇
微之別來有新詩數百篇麗絕可愛別來只是成詩癖老去何曾更酒顛

各限王程須去住重開離宴貴留連黃牛渡北移征棹

白狗崖東卷別筵

黃牛白狗皆峽中地名即與微之遇別之所也

神女臺雲間

繚繞使君灘水急潺湲風淒暝色愁楊柳月弔宵聲哭
杜鵑萬丈赤幢潭底日一條白練峽中天君還秦地辭

炎徼我向忠州入瘴煙未死會應相見在又知何地復何年

微之整集舊詩及文筆為百軸以七言長句寄樂天樂天次韻酬之餘思未盡加為六韻重寄

海內聲華併在身篋中文字絕無倫美微之也遙知獨對封

章草忽憶同為獻納臣走筆往來盈卷軸予與微之前後寄和詩數

百篇近代無如此多有也除官遞互掌絲綸予除中書舍人微之撰制詞微之除翰林學士

予撰制詞制從長慶辭高古微之長慶初知制誥文格高古始變俗體繼者效之也詩

到元和體變新

衆稱元白為千字律詩或號元和格

各有文姬才稚齒

蔡邕

無兒有女
琰字文姬

俱無通子繼餘塵

陶潛小兒名通子

琴書何必求王

粲與女猶勝與外人

重題別東樓

東樓勝事我偏知
氣象多隨昏旦移
湖卷衣裳白重疊
山張屏障綠參差
海仙樓塔晴方出
江女笙簫夜始吹

春雨星攢尋蟹火
秋風霞颭弄濤旗

餘杭風俗每寒食雨後夜涼家家持

燭尋蟹動盈萬人每歲八月
迎濤弄水者悉舉旗幟馬

宴宜雲髻新梳後
曲愛霓

裳未拍時太守三年嘲不盡郡齋空作百篇詩

憶杭州梅花因叙舊遊寄蕭協律

三年閒悶在餘杭曾為梅花醉幾場
伍相廟邊繁似雪孤山園裏麗如粧
蹋隨遊騎心長惜折贈佳人手亦香
賞自初開直至落歡因小飲便成狂
薛劉相次埋新壠沈謝雙飛出故鄉

薛劉二客沈謝二妓皆當時歌酒之侶

歌伴酒徒零散

盡惟殘頭白老蕭郎

泛太湖書事寄微之

煙渚雲帆處處通，飄然舟似入虛空。
玉杯淺酌巡初匝，金管徐吹曲未終。
黃夾纈林寒有葉，碧琉璃水淨無風。
避旗飛鷺翩翩白，驚鼓跳魚拔刺紅。
澗雪壓多松偃蹇，巖泉滴久石玲瓏。
書為故事留湖上，所見勝景多記
在湖中石上吟作新詩寄浙東。
軍府威容從道盛，江山氣色定知同。
報君一事君應羨，五宿澄波皓月中。

春早秋初因時即事兼寄浙東李侍郎

春早秋初晝夜長，可憐天氣好年光。
和風細動簾帷暖

清露微凝枕簟涼
窓下曉眠初減被
池邊晚坐乍移牀
閒從蕙草侵階綠
靜任槐花滿地黃
理曲管絃聞後院
熨衣燈火映深房
四時新景何人別
遙憶多情李侍郎

欽定四庫全書

御定全唐詩錄
卷六十四

御定全唐詩錄卷六十四

欽定四庫全書

御定全唐詩錄卷六十五

白居易八

近體詩三

池畔

結構池西廊疏理池東樹此意人不知欲為待月處

持刀剝古火切密竹竹少風來多此意人不會欲令池有

波

夜雪

已訝衾枕冷復見窓戶明
夜深知雪重時聞折竹聲

忠州郡中

鄉路音信斷山城日月遲
欲知州近遠塔前摘荔枝
醉中對紅葉

臨風杪秋樹對酒長年人
醉貌如霜葉雖紅不是春
雨中題哀柳

濕屈青條折寒飄黃葉多
不知秋雨意更遣欲如何

曲江憶元九

春來無伴閒遊少，行樂三分減二分。
何況今朝杏園裏，閒人逢盡不逢君。

醉中歸藍屋

金光門外昆明路，半醉騰騰信馬迴。
數日非關王事繫，牡丹花盡始歸來。

過天門街

雪盡終南又欲春，遙憐翠色對紅塵。
千車萬馬九衢上，

回首看山無一人

重到毓材宅有感

欲入中門淚滿巾
庭花無主兩迴春
軒窗簾幕皆依舊
只是堂前欠一人

感故張僕射諸妓

黃金不惜買蛾眉
揀得如花三四枝
歌舞教成心力盡
一朝身去不相隨

寒食夜月

風香露重梨花濕，草舍無燈愁未入。
南鄰北里歌吹時，獨倚柴門月中立。

臨江送夏瞻

瞻年七十餘

悲君老別我，霑巾七十無家。
萬里身愁見，舟行風又起。
白頭浪裏白頭人。

同李十一醉憶元九

花時同醉破春愁，醉折花枝作酒籌。
忽憶故人天際去，計程今日到梁州。

禁中九日對菊花酒憶元九

賜酒盈杯誰共持
宮花滿把獨相思
相思只傍花邊立

盡日吟君詠菊詩

元詩云不是花中偏愛菊此花開盡更無花

微之宅殘牡丹

殘紅零落無人賞
雨打風吹花不全
諸處見時猶悵望
況當元九小庭前

駱口驛舊題詩

和元微之

拙詩在壁無人愛
烏汙苔侵文字殘
惟有多情元侍御

繡衣不惜拂塵看

江上笛

江上何人夜吹笛
聲聲似憶故園春
此時聞者堪頭白
況是多愁少睡人

望驛臺

三月三十日

靖安宅裏當窓柳
望驛臺前撲地花
兩處春風同日盡
居人思客客思家

寄上大兄

在下邳林居作

秋鴻過盡無書信，病戴紗巾強出門。
獨上荒臺東北望，日西愁立到黃昏。

暮立

黃昏獨立佛堂前，滿地槐花滿樹蟬。
大抵四時心總苦，就中腸斷是秋天。

王昭君

時年十七

滿面胡沙滿鬢風，眉銷殘黛臉銷紅。
愁苦辛勤憔悴盡，如今却是畫圖中。

漢使却迴憑寄語黃金何日贖蛾眉君王若問妾顏色
莫道不如宮裏時

重到城七絕句

選五首

見元九

容貌一日減一日心情十分無九分每逢陌路猶嗟歎
何況今朝是見君

高相宅

青苔故里懷恩地白髮新生抱病身涕淚雖多無哭處

永寧門館屬他人

張十八

諫垣幾見遷遺補憲府頻聞轉殿監獨有詠詩張太祝
十年不改舊官銜

劉家花

劉家牆上花還發李十門前草又春處處傷心心始悟
多情不及少情人

仇家酒

年年老去歡情少處處春來感事深時到仇家非愛酒
醉時心勝醒時心

松樹

和元微之

白金換得青松樹君既先栽我不栽幸有西風易憑仗
夜深偷得好聲來

醉後却寄元九

蒲池村裏匆匆別澧水橋邊兀兀迴行到城門殘酒醒
萬重離恨一時來

雨夜憶元九

天陰一日便堪愁，何況連宵雨不休。
一種雨中君最苦。

偏梁閣道向通州

雨中攜元九詩訪元八侍御

微之詩卷憶同開，暇日多應不入臺。
好句無人堪共詠，衝泥蹋水就君來。

白牡丹

白花冷淡無人愛，亦占芳名道牡丹。
應是東宮白贊善。

被人還喚作朝官

病中答招飲者

顧我鏡中悲白髮
儘君花月醉青春
不緣眼痛兼身病
可是樽前第二人

燕子樓三首 并序

徐州故尚書張有愛妓曰盼盼善歌舞雅多風
態予為校書郎時遊徐泗間張尚書宴予酒酣
出盼盼以佐飲歡甚予因贈詩云醉嬌勝不得

風嫋牡丹花盡歡而去爾後絕不相聞迨茲僅
一紀矣昨日司勳負外郎張仲素續之訪余因
吟新詩有燕子樓三首詞甚婉麗詰其由為盼
盼作也續之從事武寧軍累年頗知盼盼始末
云尚書既沒歸葬東洛而彭城有張氏舊第第
中有小樓名燕子盼盼念舊愛而不嫁居是樓
十餘年幽獨塊然於今尚在予愛續之新詠感
彭城舊遊因同其題作三絕句

滿窓明月滿簾霜被冷燈殘拂卧牀燕子樓中霜月夜
秋來只為一人長

鈿暈羅衫色似煙幾回欲著即潜然自從不舞霓裳曲
疊在空箱十二年

今春有客洛陽回曾到尚書墓上來見說白楊堪作柱
爭教紅粉不成灰

初貶官過望秦嶺

草草辭家憂後事遲遲去國問前途望秦嶺上回頭立

無限秋風吹白鬚

藍橋驛見元九詩

詩中云江陵歸時逢春雪

藍橋春雪君歸日
秦嶺秋風我去時
每到驛亭先下馬
循牆遶柱覓君詩

韓公堆寄元九

韓公堆北澗西頭
冷雨涼風拂面秋
努力南行少惆悵
江州猶似勝通州

武關南見元九題山石榴花見寄

往來同路不同時
前後相思兩不知
行過關門三四里
榴花不見見君詩

白鷺

人生四十未全衰
我為愁多白髮垂
何故水邊雙白鷺
無愁頭上亦垂絲

舟夜贈內

三聲猿後垂鄉淚
一葉舟中載病身
莫凭水窓南北望
月明月闇總愁人

逢舊

我梳白髮添新恨
君掃青蛾減舊容
應被傍人恠惆悵
少年離別老相逢

舟中讀元九詩

把君詩卷燈前讀
詩盡燈殘天未明
眼痛滅燈猶闇坐
逆風吹浪打船聲

聽崔七妓人箏

花臉雲鬟坐玉樓
十三絃裏一時愁
憑君向道休彈去

白盡江州司馬頭

望江州

江迴望見雙華表
知是潯陽西郭門
猶去孤舟三四里
水煙沙雨欲黃昏

宿西林寺

木落天晴山翠開
愛山騎馬入山來
心知不及柴桑令

一宿西林便欲回

柴桑令劉遺民是也

惜落花贈崔二十四

漠漠紛紛不奈何狂風急雨兩相和
晚來悵望君知否
枝上稀疏地上多

題廬山山下湯泉

一眼湯泉流向東
浸泥澆草煖無功
驪山溫水因何事
流入金鋪玉甃中

大林寺桃花

人間四月芳菲盡
山寺桃花始盛開
長恨春歸無覓處
不知轉入此中來

戲問山石榴

小樹山榴近砌栽
半含紅萼帶花來
爭知司馬夫人妬
移到庭前便不開

聞龜兒詠詩

憐渠已解詠詩章
搖膝支頤學二郎
莫學二郎吟太苦
纔年四十鬢如霜

劉十九同宿

時淮寇
初破

紅旗破賊非吾事
黃紙除書無我名
惟共嵩陽劉處士

圍棋賭酒到天明

贈江客

江柳陰寒新雨地
塞鴻聲急欲霜天
愁君獨向沙頭宿
水遠蘆花月滿船

別草堂三絕句

正聽山鳥向陽眠
黃紙除書落枕前
為感君恩須暫起
爐峰不擬住多年

久眠褐被為居士
忽挂緋袍作使君
身出草堂心不出

廬山未要勒移文

三間茅舍向山開一帶山泉遶舍迴
山色泉聲莫惆悵
三年官滿却歸來

鍾陵餞送

翠幕紅筵高在雲歌鐘一曲萬家聞
路人指點滕王閣
看送忠州白使君

木蓮樹生巴峽山谷間巴民亦呼為黃心樹
大者高五丈涉冬不凋身如青楊有白文葉如桂厚

大無脊花如蓮香色艷膩皆同獨房蕊有異四
月初始開自開迨謝僅二十日忠州西北十里
有鳴玉谿生者穠茂惜其遐僻因題三絕句云
如折芙蓉栽旱地似拋芍藥挂高枝雲埋水隔無人識
惟有南賓太守知

紅似臙脂膩如粉傷心好物不須臾山中風起無時節
明日重來得在無

已愁花落荒巖底復憾根生亂石間幾度欲移移不得

天教拋擲在深山

東樓招客夜飲

莫辭數數醉東樓
除醉無因破得愁
惟有綠樽紅燭下
暫時不似在忠州

竹枝詞

瞿塘峽口水煙低
白帝城頭月向西
唱到竹枝聲咽處
寒猿閣鳥一時啼

竹枝苦怨怨何人
夜靜山空歇又聞
蠻兒巴女齊聲唱

愁殺江南病使君

巴東船舫上巴西波面風生雨脚齊
水蓼冷花紅簇簇
江籬濕葉碧淒淒

江畔誰人唱竹枝前聲斷咽後聲遲
怪來調苦緣詞苦
多是通州司馬詩

送高侍御使迴因寄楊八

明月峽邊逢制使黃茆岼上是忠州
到城莫說忠州惡
無益虛教楊八愁

三月三日

暮春風景初三日流世光陰半百年欲作閒遊無好伴
半江惆悵却回船

寒食夜

四十九年身老日一百五夜月明天抱膝思量何事在
癡男騃女喚鞦韆

期不至

紅燭青樽久延佇出門入門天欲曙星稀月落竟不來

煙柳隴隴鵲飛去

傷春詞

深淺簷花千萬枝
碧紗窗外轉黃鸝
殘粧含淚下簾坐
盡日傷春春不知

後宮詞

淚濕羅巾夢不成
夜深前殿按歌聲
紅顏未老恩先斷
斜倚薰籠坐到明

思婦眉

春風搖蕩自東來折盡櫻桃綻盡梅
惟餘思婦愁眉結
無限春風吹不開

空閨怨

寒月沈沈洞房靜真珠簾外梧桐影
秋霜欲下手先知
燈底裁縫剪刀冷

採蓮曲

菱葉縈波荷颭風荷花深處小船通
逢郎欲語低頭笑
碧玉搔頭落水中

內鄉縣村路作

日下風高野路涼
緩驅疲馬闇思鄉
渭邨秋物應如此
棗赤梨紅稻穗黃

竹樓宿

小書樓下千竿竹
深火爐前一盞燈
此處與誰相伴宿
燒丹道士坐禪僧

自感

宴遊寢食漸無味
杯酒管絃徒繞身
賓客歡娛僮僕飽

始知官職為他人

醉戲諸妓

席上爭飛使君酒
歌中多唱舍人詩
不知明日休官後
逐我東山去是誰

河陰夜泊憶微之

憶君我正泊行舟
望我君應上郡樓
萬里月明同此夜
黃河東面海西頭

杭州迴舫

自別錢塘山水後不多飲酒懶吟詩欲將此意憑回棹
與報西湖風月知

寫新詩寄微之偶題卷後

寫了吟看滿卷愁淺紅牋紙小銀鈎未容寄與微之去
已被人傳到越州

種白蓮

吳中白藕洛中栽莫戀江南花懶開萬里攜歸爾知否
紅蕉朱槿不將來

宿寶使君莊水亭

使君何在在江東池柳初黃杏欲紅
有興即來閒便宿不知誰是主人翁

杏園花下贈劉郎中

怪君把酒偏惆悵曾是貞元花下人
自別花來多少事東風二十四回春

酬嚴給事

聞唐昌觀玉蕊花下有遊仙絕句

羸女偷乘鳳去時洞中潛歇弄瓊枝
不緣啼鳥春饒舌

青瑣仙郎可得知

白蓮池汎舟

白藕新花照水開
紅窓小舫信風迴
誰教一片江南興
逐我殷勤萬里來

晚歸府

晚從履道來歸府
街路雖長尹不嫌
馬上涼於牀上坐
綠槐風透紫蕉衫

春風

春風先發苑中梅
櫻杏桃梨次第開
薺花榆莢深村裏
亦道春風為我來

府酒五絕

選一首

辨味

甘露太甜非正味
醴泉雖潔不芳馨
杯中此物何人別
柔旨之中有典型

楊柳枝詞

六么水調家家唱
白雪梅花處處吹
古歌舊曲君休聽

聽取新翻楊柳枝

陶令門前四五樹亞夫營裏百千條何似東都正二月
黃金枝映洛陽橋

依依嫋嫋復青青勾引春風無限情
雪花繁空撲地
綠絲條弱不勝鶯

紅板江橋青酒旗館娃宮暖日斜時
可憐雨歇東風定
萬樹千條各自垂

蘇州楊柳任君誇更有錢塘勝館娃
若解多情尋小小

綠楊深處是蘇家

蘇家小女舊知名楊柳風前別有情
剝條盤作銀環樣
卷葉吹為玉笛聲

葉含濃露如啼眼
枝嫋輕風似舞腰
小樹不禁攀折苦
乞君留取兩三條

人言柳葉似愁眉
更有愁腸似柳絲
柳絲挽斷腸牽斷
彼此應無續得期

浪淘沙詞

白浪茫茫與海連
平沙浩浩四無邊
暮去朝來淘不住
遂令東海變桑田

青草湖中萬里程
黃梅雨裏一人行
愁見灘頭夜泊處
風翻閣浪打船聲

借問江潮與海水
何似君情與妾心
恨不如潮有信
相思始覺海非深

海底飛塵終有日
山頭化石豈無時
誰道小郎拋小婦
船頭一去沒迴期

病中詩十五首

并序選
二首

開成己未歲余蒲柳之年六十有八冬十月甲

寅旦始得風痺之疾體癢音闕目眩左足不支蓋

老病相乘時而至耳余早棲心釋梵浪跡老莊

因疾觀身果有所得何則外形骸而內忘憂患

先禪觀而後順醫治旬月以還厥疾少間杜門

高枕澹然安閒吟諷興來亦不能遏因成十五

首題為病中詩且貽所知兼用自廣昔劉公幹

病漳浦謝康樂卧臨川咸有篇章抒詠其志今
引而序之者慮不知我者或加誚焉

賣駱馬

五年花下醉騎行臨賣迴頭嘶一聲項籍顧騅猶解歎
樂天別駱豈無情

別柳枝

兩枝楊柳小樓中嫋娜多年伴醉翁明日放歸歸去後
世間應不要春風

夜涼

露白風清庭戶涼
老人先著夾衣裳
舞腰歌袖拋何處
惟對無絃琴一張

客有說

客即李浙東也所說不能具錄其事自注

近有人從海上迴
海山深處見樓臺
中有仙龕虛一室

多傳此待樂天來

按逸史會昌元年李師稷中丞為浙東觀察使有商客遭風飄蕩至一大

山盡非人間維舟上岸至一處若大寺觀一道人鬚眉悉白侍衛數人坐大殿上與語曰汝中國人有緣方得一到此蓬萊山也遣左右引遊觀院宇數十皆有名號至一院高鏢甚嚴因窺之衆花滿庭堂有裊褥焚香階

下客問之答曰此是白樂天樂天樂天未來耳乃潛記之歸旬日至越具白廉使李公盡錄以報白公先是白公平生惟脩上生業及覽李公所報乃為詩二首答之其事如此

答客說

吾學空門非學仙恐君此說是虛傳海山不是吾歸處

歸即應歸兜率天

予晚年結彌勒上生業故云

楊柳枝詞

一樹春風萬萬枝嫩於金色軟於絲永豐西角荒園裏

盡日無人屬阿誰

雲溪友議曰居易有妓樊素善歌小蠻善舞常為詩曰櫻桃樊素口楊柳

小蠻腰年既高邁而小蠻方
豐艷因作楊柳詞以託意焉

詔取永豐柳植禁苑感賦

一樹哀殘委泥土雙枝榮耀植天庭定知元象今春後

柳宿光中添兩星

宣宗朝國樂唱前詞上問誰作永豐
在何處左右具以對遂因東使命取

永豐柳兩株植于禁中居易感上
知其名且好尚風雅又為詩一章

附七老會詩并序

胡吉劉鄭盧張等六賢皆多年壽余亦次焉於

東都傲居履道坊為尚齒之會七老相顧既醉

且歡靜而思之此會希有因各賦七言六韻詩
一章以記之或傳諸好事者時會昌五年三月

二十四日樂天序

胡杲

懷州司馬
年八十九

閒居同會在三春大抵愚年最出羣霜鬢不嫌杯酒興
白頭仍愛玉爐薰徘徊玩柳心猶健老大看花意却勤
鑿落滿斟判酌酌香囊高掛任氤氳搜神得句題紅紙
望景長吟對白雲今日交情何不替齊年同事聖明君

吉皎

衛尉卿致仕
年八十八

休官罷任已間居林苑園亭興有餘對酒最宜花藻發
邀歡不厭柳條初低腰醉舞垂緋袖擊筯謳歌任褐裾
寧用管絃來合雜自親松竹且清虛飛觥酒到須先酌
賦詠詩成不住書借問商山賢四皓不知此後更何如

劉真

前磁州刺史
年八十七

垂絲今日幸同筵朱紫居身是大年賞景尚知心未退
吟詩猶覺力完全閒庭飲酒當三月在席揮毫象七賢

山茗煮時秋霧碧玉杯斟處綵霞鮮
臨堦花笑如歌妓
傍竹泉聲當管絃
雖未學窮生死訣
人間豈不是神仙

鄭據

前龍武軍長史年八十五

東洛幽閒日暮春
邀歡多是白頭賓
官班朱紫多相似
年紀高低次第勻
聯句每言松竹意
停杯多說古今人
更無外事來心肺
空有清虛入思神
醉舞兩迴迎勸酒
狂歌一曲會閒身
今朝何事偏情重
同作明時列任人

盧真

前侍御史內供奉官年八十四

三春已盡洛陽宮
天氣初晴景象中
千朶嫩桃迎曉日
萬株垂柳逐和風
非論官位皆相似
及至年高亦共同
對酒歌聲猶覺妙
玩花詩思豈能窮
先時共作三朝貴
今日猶逢七老翁
但願醪醕常滿酌
煙霞萬里會應通

張渾

前永州刺史
年七十七

幽亭春盡共為歡
印綬居身是大官
遁跡豈勞登遠岫
垂絲何必坐溪磻
詩聯六韻猶應易
酒飲三杯未覺難
每况襟懷同宴會
共將心事比波瀾
風吹野柳懸羅帶

日照庭花落綺紈此席不須鋪錦帳斯筵堪作畫圖看

白居易

刑部尚書致
任年七十四

七人五百八十四拖紫紆朱垂白鬚囊裏無金莫嗟歎
樽中有酒且歡娛吟成六韻神還壯飲到三杯氣尚麤
鬼哉狂歌教婢拍婆娑醉舞遣孫扶天年高過二疏傳
人數多於四皓圖除却三山五天竺人間此會且應無

樂天云其年夏又有二老年貌絕倫同歸故鄉亦來斯
會續命書姓名年齒寫其形貌附于圖右與前七老題
為九老圖仍以一絕贈之曰雪作鬚眉雲作衣遼東華
表暮雙歸當時一鶴猶希有何况今逢兩令威二老者

洛中遺老李元爽年一百三十六禪僧如滿年九十五
又云時秘書狄兼謨河南尹盧貞以年未及七十雖與
會而不
及列



御定全唐詩錄卷六十五

欽定四庫全書

集部
御定全唐詩錄卷六十六
七六

詳校官左中允_臣 璿五珠

主事銜_臣 徐以坤覆勘

總校官原任中允_臣 王燕緒

校對官中書_臣 田尹衡

謄錄監生_臣 龐兆懋

欽定四庫全書

御定全唐詩錄卷六十六

元稹

稹字微之河南人幼孤母鄭賢而文親授書傳九
歲工屬文十五擢明經判入等補校書郎元和元
年舉制科對策第一拜左拾遺當路者惡之出為
河南尉以母喪解服除拜監察御史按獄東川因
劾奏節度使嚴礪七刺史皆奪俸礪黨怒俄分司

東都復論奏韓臯等十餘事會河南尹房式坐罪
積舉劾按故事追攝移書停務詔薄式罪名積還
次敷水驛中人仇士良夜至積不讓中人怒擊積
敗面宰相以積年少輕樹威失憲臣體貶江陵士
曹參軍而李絳崔羣白居易皆論其枉久乃徙通
州司馬改號州長史元和末召拜膳部員外郎積
尤長於詩與居易名相埒天下傳諷號元和體往
往播樂府楊宗在東宮妃嬪近習皆誦之宮中呼

元才子稹之謫江陵善監軍崔潭浚長慶初潭浚
方親幸以稹歌辭數十百篇奏御帝大悅問稹今
安在曰為南宮散郎即擢祠部郎中知制誥俄遷
中書舍人翰林承旨學士裴度劾稹傾亂國政因
出為工部侍郎然眷倚不衰未幾進同中書門下
平章事朝野雜然輕笑李逢吉構之罷宰相出為
同州刺史再徙浙東觀察使太和三年召為尚
書左丞俄拜武昌節度使卒贈尚書右僕射所論

著甚多行於世在越時辟竇鞏鞏天下工為詩與之酬和故鏡湖秦望之竒益傳時號蘭亭絕唱

全唐詩話云稹聞西蜀薛濤有辭辯及為監察使蜀以御史推鞠難得見焉嚴司空潛知其意每遣薛往洎登翰林以詩寄曰錦江滑膩蛾眉秀幻出文君與薛濤言語巧偷鸚鵡舌文章分得鳳凰毛紛紛詞客多停筆箇箇公侯欲夢刀別後相思隔煙水菖蒲花發五雲高後廉問浙東乃有劉採春

自淮甸而來容華莫比元贈詩曰新妝巧樣畫雙
蛾慢裏常州透額羅正面偷勻光滑笏緩行輕踏
皺紋波言辭雅措風流足舉止低徊秀媚多更有
惱人腸斷處選詞能唱望夫歌即羅噴之曲也元
在浙河七年因醉題東武亭其詩曰役役行人事
紛紛簿書功夫兩衙盡留滯七年餘病痛梅天
發親情海岼疎因循未歸得不是戀鱸魚盧侍郎
簡永戲曰丞相雖不為鱸魚為好鏡湖春色耳謂

採春也

本事詩云元相公積為御史鞫獄梓潼時白尚書
在京與名輩遊慈恩小酌花下為詩寄元曰花時
同醉破春愁醉折花枝當酒籌忽憶故人天際去
計程今日到梁州時元果及褒城亦寄夢遊詩曰
夢君兄弟曲江頭也向慈恩院裏遊驛吏喚人排
馬去忽驚身在古梁州千里神交合若符契自有
感夢記備記其事

古體詩

兔絲

人生莫依倚，依事不成君。
看兔絲蔓依倚，榛與荆荆。
榛易蒙密，百鳥撩亂鳴。
下有狐兔穴，奔走亦縱橫。
樵童斫將去，柔蔓與之并。
翳薈生可恥，束縛死無名。
桂樹月中出，珊瑚石上生。
俊鶻度海食，應龍升天行。
靈物本特達，不復相纏縈。
縈縈竟何有，荆棘與飛莖。

雉媒

雙雉在野時可憐同嗜欲毛衣前後成一種文章足一
雉獨先飛衝開芳草綠網羅幽草中暗被潛羈束剪刀
摧六翮絲線縫雙目啖養能幾時依然已馴熟都無舊
性靈返與他心腹置在芳草中翻令誘同族前時相失
者思君意彌篤朝朝舊處飛往往巢邊哭今朝樹上啼
哀音斷還續遠見爾文章知君草中伏和鳴忽相召鼓
翅遙相矚畏我未肯來又啄翳前粟斂翮遠投君飛馳
勢奔蹙骨挂在君前向君聲促促信君決無疑不道君

相覆自恨飛太高，踈羅偶然觸。看看架上鷹，擬食無罪肉。君意定何如，依舊雕籠宿。

種竹并序

昔樂天贈予詩云：無波古井水，有節秋竹竿。予秋來種竹廳下，因而有懷，聊書十韻。

昔公憐有直，比之秋竹竿。秋來苦相憶，種竹廳前看。失地顏色改，傷根枝葉殘。清風猶淅淅，高節空團團。鳴蟬聒暮景，跳蛙集幽欄。塵土復晝夜，稍雲良獨難。丹丘信

云遠安得臨仙壇瘴江冬草綠何人驚歲寒可憐亭亭
幹一一青琅玕孤鳳竟不至坐傷時節闌

說劍

吾友有寶劍密之如密友我實膠漆交中堂共杯酒酒
酣肝膽露恨不眼前剖高唱荆卿歌亂擊相如缶更擊
復更唱更舞亦更壽白虹坐上飛青蛇匣中吼我聞音
響異疑是干將鬪為君再拜言神物可見不君言我所
重我自為君取迎篋已焚香近鞘先澤手徐抽寸寸刃

漸屈彎彎肘殺殺霜在鋒團團月臨紐逡巡潜虬躍鬱
律驚左右霆電滿室光蛟龍逐奮走何人為鑄之干將
別來久鑄時近山破箴在松桂朽幽質獄中埋神人水
心守本是泥稽淬果非雷煥有我欲評劍功願君良聽
受劍可剗犀兕劍可切瓊玖劍決天外雲劍衝日中斗
劍墮妖蛇腹劍拂佞臣首太古初斷鼇武王親擊紂燕
丹卷地圖陳平綰花綬曾披桂樹枝寒光射林藪曾經
鑄農器利用剪稂莠神物終變化復為龍牝牡晉末武

庫燒脫然排戶牖為欲掃羣兇散作彌天帚自茲失所
往豪英共為詬今復誰人鑄挺然千載後既非古風胡
無乃近鷓九自我與君遊平生益自負况驚寶劍出重
以雄心扣此劍何太奇此心何太厚勸君慎所寶所用
無或苟潛將避魑魅勿但驚妾婦留斬泓下蛟莫試街
中狗古今困泥滓我亦空塵垢俗耳驚大言逢人少開
口

遣興

始見梨花房坐對梨花白行看梨葉青已復梨葉赤嚴
霜九月半危蒂幾時客況有高原秋風四來迫

莫厭夏日長莫愁冬日短欲識短復長君看寒又暖城
中百萬家冤哀雜絲管草沒奉誠園軒車昔曾滿

孤竹迸荒園誤與蓬麻列久擁蕭蕭風空長高高節嚴
霜蕩羣穢蓬斷麻亦折獨立轉亭亭心期鳳凰別

酬樂天

放鶴在深水置魚在高枝升沈或異勢同謂非所宜君

為邑中吏皎皎鸞鳳姿顧我何為者翻侍白玉墀昔作
芸香侶三載不暫離速茲忽相失旦夕夢魂思崔魏驪
山頂宮樹遙參差祇得兩相望不得長相隨多君歲寒
意裁作秋興詩上有風塵苦下言時節移官家事拘束
安得攜手期願為雲與雨會合天之垂

臺中鞠獄憶開元觀舊事呈損之兼贈周兄四十

韻

憶在開元觀食柏練玉顏踈慵日高卧自謂輕人窠李

生隔牆住隔牆如隔山怪我久不識先來問驕頑十過
乃一往遂成相往還以我文章卷文章甚編爛因言辛
庾輩亦願效羸孱既迴數子顧展轉相連攀驅令選科
目若在闈與闈學隨塵土墜漫數公卿闕唯恐壞情性
安能懼謗訕還招辛庾李靜處杯巡環進取果由命不
由趨險艱穿楊二三子弓矢次第彎推我亦上道再聯
朝士班二月除御史三月使巴蠻蠻民詰誦訴蓄指明
痛瘼憐蠻不解語為發昏帥姦歸來五六月早色天地

殷分司別兄弟各各淚潜潜哀哉劇部職唯數賊罪緩
死歎依稀取鬪辭方便刑道心常自愧柔髮難久黜折
支望車乘支痛誰置患竒哉乳臭兒緋紫裯被間漸大
官漸貴漸富心漸慳鬧裝轡頭觸靜拭腰帶斑鶴子繡
線鞞狗兒金油鑲香湯洗驄馬翠篋籠白鷗月請公主
封冰受天子頒開筵試歌舞別宅寵妖嬈坐卧摩綿褥
捧擁綵絲鬟旦夕不相離比翼若飛鸞而我亦何苦三
十身已鰥愁吟心骨顛寒臥支體瘳居處雖幽靜尤悔

少愉懶不如周道士鶴嶺臨鐘灣繞院松瑟瑟通畦水
潺潺陽坡自尋巖村沼看漚管窮通兩未遂營營真老
閒

元和五年予官不了罰俸西歸

時公分司東都劾河南尹房式詔薄

式罪名
公還京

三月六日至陝府與吳十一兄端公崔二

十二院長思愴曩游因投五十韻

小年閒愛春認得春風意未有花草時先釀曉窓睡霞
朝澹雲色霽景牽詩思漸到柳枝頭川光始明媚長安

車馬客傾心奉權貴晝夜塵土中那言早春至此時我
獨遊我遊有倫次閒行曲江岸便宿慈恩寺扣林引寒
龜疏叢出幽翠凌晨過杏園曉露凝芳氣初陽好明淨
嫩樹憐低庠排房似綴珠欲啼紅臉淚新鶯語嬌小淺
水光流利冷飲空腹杯因成日高醉酒醒聞飯鐘隨僧
受遺施餐罷還復遊過從上文記行逢二月半始足遊
春騎是時春已老我遊亦云既藤開九華觀草結三條
隧新筍躡犀株落梅翻蝶翅名倡繡轂車公子青絲轡

朝士遇旬休豪家得春賜提攜好音樂剪鍤空田地同
占杏花園喧闐各叢萃顧予煩寢興復往散憔悴倦僕
色饑羸蹇驢行跛痺春衫未成就冬服漸塵膩傾蓋吟
短章書空憶難字遙聞公主笑近被王孫戲邀我上華
筵橫頭坐賓位那知我年少深解酒中事能唱犯聲歌
偏精變籌義含詞待殘拍促舞遞繁吹叫噪擲骰盈生
獰攝觥使逡巡光景晏散亂東西異古觀閉閉門依然
復幽悶無端矯情性漫學求科試薄藝何足云虛名偶

頻遂拾遺天子前密奏升平議名見不須史檢庸已猜

忌朝陪香案班暮作風塵尉

元和元年為左拾遺尋出為河南尉

去歲又

登朝

元和四年母喪服闋拜御史

登為柏臺吏臺官相束縛不許放

情志寓直勞送迎上堂煩避諱分司在東洛所職尤不
易罰俸得西歸心知受朝庇常山攻小寇淮南擇良帥
國難身不行勞生欲何為吾兄諳性靈崔子同臭味投
此挂冠詞一生還自恣

寄吳士矩端公五十韻

昔在鳳翔日十歲即相識未有好文章逢人賞顏色可
憐何郎面二十纔冠飾短髮予近梳羅衫紫蟬翼伯舅
各驕縱仁兄未摧抑事業若盃盤詩書甚徽纒西州戎
馬地賢豪事雄特百萬時可贏十千良易借寒食桐陰
下春風柳林側藉草送遠遊列筵酬博塞姜蕤雲幕翠
燦爛紅茵柅繪縷輕似絲香醅膩如醑將軍頻下城佳
人盡傾國媚語嬌不聞纖腰軟無力歌辭妙宛轉舞態
能刻刻箏絃玉指調粉汗紅綃拭予時最年少專務酒

中職未能媿生獍偏矜任狂直曲庇桃根蓋橫講捎雲
式亂布鬪分朋惟新聞讒慝恥作最先吐羞言未朝食
醉眼漸紛紛酒聲頻餒餒扣節參差亂飛觥往來織強
起相維持翻成兩匍匐邊霜颯然降戰馬鳴不息但喜
秋光麗誰憂塞雲黑常隨獵騎走多在豪家匿夜飲天
既明朝歌日還長荒狂歲云久名利心潛逼時輩多得
途親朋屢相勅間因適農野忽復愛稼穡平生中聖人
翻然腐腸賊亦從酒仙去便被書魔惑脫跡壯士場甘

心豎儒域矜持翠筠管敲斷黃金勒屢盃蘭膏燈猶研
兔枝墨崎嶇來掉蕩矯枉事沈默隱笑甚艱難斂容還
劣削與君始分散勉我勞脩飾岐路各營營別離長惻
惻行看二十載萬事紛何極相值或須臾安能洞骨髓
昨來陝邽會悲歡兩難克問我新相知但報長相憶豈
無新知者不及小相得亦有生歲遊同年不同德為別
詎幾時伊子墜溝洫大江鼓風浪遠道參荆棘往事返
無期前途浩難測一旦得自由相求北山北

三月二十四日宿曾峰館夜對桐花寄樂天

微月照桐花月微花漠漠怨澹不勝情低徊拂簾幕葉
新陰影細露重枝條弱夜久春恨多風清暗香薄是夕
遠思君思君瘦如削但感事睽違非言官好惡奏書金
鑾殿步屣青龍閣我在山館中滿地桐花落

酬樂天書懷見寄

本題云初與微之別後忽夢見
之及寤而微之書至兼覽桐花

之什悵然書
懷次用本韻

新昌北門外與君從此分街衢走車馬塵土不見君君

為分手歸我行行不息我行秦嶺南君直樞星北秦嶺
高崔魏商山好顏色月照山館花裁詩寄相憶天明作
詩罷草草從所如憑人寄將去三月無報書荊州白日
晚城上鼓鼙行逢賀州牧致書三四封封題樂天字
未拆已霑裳拆書八九讀淚落千萬行中有酬我詩句
句截我腸仍云得詩夜夢我魂悽涼終言作書處上直
金鑿東詩書費一夕萬恨緘其中中宵宮中出復見宮
月斜書罷月亦落曉燈垂暗花想君書罷時南望勞所

思况我江上立吟君懷我詩懷我浩無極江水秋正深
清見萬丈底照我平生心感君求友什因報壯士吟持
謝衆人口銷盡猶是金

張舊蚊幃

踰年間生死千里曠南北家居無見期况乃異鄉國破
盡裁縫衣忘收遺翰墨獨有纈紗幃憑人遠攜得施張
合歡榻展卷雙鴛翼已矣長空虛依然舊顏色徘徊將
就寢徒倚情何極昔透香田田今無魂惻惻隙穿斜月

照燈背空牀黑、達理強開懷、夢啼還過臆、平生貧寡歡、
天枉勞苦憶我亦、詎幾時胡為自摧逼、燭蛾焰中舞繭、
蠶叢上織焦爛、各自求他人顧、何力多離因、苟合惡影、
當務息往事、勿復言將來、幸前識

夢遊春

昔歲夢遊春、夢遊何所遇、夢入深洞中、果遂平生趣、清
冷淺漫流、畫舫蘭篙渡、過盡萬株桃、盤旋竹林路、長廊
抱小樓、門牖相迴互、樓下雜花叢、叢邊遶鴛鴦、池光漾

霞影曉日初明煦未敢上階行頻移曲池步烏龍不作
聲碧玉曾相慕漸到簾幙間徘徊意猶懼閒窺東西閣
竒玩參差布隔子碧油糊駝鈎紫金鍍逡巡日漸高影
響人將寤鸚鵡饑亂鳴嬌狂睡猶怒簾開侍兒起見我
遙相諭鋪設繡紅茵施張鈿妝具潛塞翡翠帷瞥見珊
瑚樹不辨花貌人空驚香若霧身迴夜合偏態斂晨霞
聚睡臉桃破風汗妝蓮委露叢梳百葉髻時勢金甃重
臺屨踏殿樣紕軟鈿頭裙瑟瑟色玲瓏合歡袴夾纈名鮮妍脂

粉薄闇澹衣裳故最似紅牡丹雨來春欲暮夢魂良易
驚靈境難久寓夜夜望天河無由重沿沂結念心所期
返如禪頓悟覺來八九年不向花迴顧雜合兩京春喧
闐衆禽護我到看花時但作懷仙句浮生轉經歷道性
尤堅固近作夢仙詩亦知勞肺腑一夢何足云良時自
婚娶當年二紀初嘉節三星度朝舜玉珮迎高松女蘿
附韋門正全盛出入多歡裕甲第漲清池鳴騶引朱輅
廣榭舞菱蕤長筵賓雜厝青春詎幾日華實潛幽蠹秋

月照潘郎空山懷謝傅紅樓嗟壞壁金谷迷荒戍石壓
破闌干門摧舊柱桓雖云覺夢殊同是終難駐綜緒竟
何如琴絲不成絢卓女白頭吟阿嬌金屋賦重壁盛姬
臺青冢明妃墓盡委窮塵骨皆隨流波注幸有古如今
何勞鱣比素况余當盛時蚤歲諧時務詔冊冠賢良諫
垣陳好惡三十再登朝一登還一仆寵榮非不早遭迴
亦云屢直氣在膏肓氛氲日沈痼不言意不快快意多
言忤忤誠人所賊性亦天之付乍可沈為香不能浮作

瓠誠為堅所守未為明所措事事身已經營營計何誤
美玉琢文珪良金填武庫徒謂自堅貞安知受礪鑄長
絲羈野馬密網羅陰兔物外各迢迢誰能遠相錮時來
既若飛禍速當如鷺曩意自未精此行何所訴努力去
江陵笑言誰與晤江花縱可憐奈非心所慕石竹逞姦
黠蔓菁誇畝數一種薄地生淺深何足妒荷葉水上生
團團水中住瀉水置葉中君看不相汚

和劉猛古題樂府

冬白紵

吳宮夜長宮漏欵簾幕四垂燈焰暖西施自舞王自管
雪紵翻翻鶴翎散聲上促節牽繁舞腰嬾舞腰嬾王罷飲
蓋覆西施鳳花錦身作匡牀臂為枕朝佩縱玉王晏寢
寢醒閤報門無事子胥死後言為諱近王之臣諭王意
共笑越王窮惓惓夜夜抱冰寒不睡

連昌宮詞

連昌宮中滿宮竹歲久無人森似束又有墻頭千葉桃

風動落花紅軟軟宮邊老人為予泣少年進食曾因入
上皇正在望仙樓太真同凭欄干立樓上樓前盡珠翠
炫轉熒煌照天地歸來如夢復如癡何暇備言宮裏事
初過寒食一百六店舍無煙宮樹綠夜半月高絃索鳴
賀老琵琶定場屋力士傳呼覓念奴念奴潛伴諸郎宿
須臾覓得又連催特勅街中許然燭春嬌滿眼睡紅綃
掠削雲鬟旋裝束飛上九天歌一聲二十五郎吹管逐
逡巡大遍涼州徹色色龜茲鞞錄續李暮摩笛傍宮牆

偷得新翻數般曲

自注念奴天寶中名倡善歌每歲樓下酺宴累日之後萬衆喧隘嚴安之

韋黃裳輩闢易不能禁衆樂為之罷奏明皇遣高力士大呼于樓上曰欲遣念奴唱歌邠二十五郎吹小管遂看人能聽否未嘗不悄然奉詔其為當時所重也如此然而明皇不欲奪俠遊之盛未嘗置在宮禁或歲幸湯泉時巡東洛有司潛遣從行而已又明皇常于上陽宮夜後按新翻一曲屬明夕正月十五日潛遊燈下忽聞酒樓上有笛奏前夕新曲大駭之明日密遣捕捉笛者詰驗之自云其夕竊于天津橋翫月聞宮中度曲遂于橋柱上插譜記之臣即長安少年善笛者李暮也明皇異而遣之

平明大駕發行宮萬

人鼓舞塗路中百官隊仗避岐薛楊氏諸姨車鬪風明年十月東都破御路猶存祿山過驅令供頓不敢藏萬

姓無聲淚潛墮兩京定後六七年却尋家舍行宮前
莊園燒盡有枯井行宮門閉樹宛然爾後相傳六皇
帝不到離宮門久閉往來少年說長安玄武樓成華
萼廢去年勅使因斫竹偶值門開暫相逐荆榛櫛比
塞池塘狐兔驕癡緣樹木舞榭歌傾基尚存文窓窈
窕紗猶綠塵埋粉壁舊花鈿烏啄風箏碎珠玉上皇
偏愛臨砌花依然御榻臨堦斜蛇出燕巢盤鬪棋茵
生香案正當衙寢殿相連端正樓太真梳洗樓上頭

晨光未出簾影黑，至今反掛珊瑚鈎。指示傍人因慟哭，
却出宮門淚相續。自從此後還閉門，夜夜狐狸上門屋。
我聞此語心骨悲，太平誰致亂者誰。翁言野父何分別，
耳聞眼見為君說。姚崇宋璟作相公，勸諫上皇言語切。
變理陰陽禾黍豐，調和中外無兵戎。長官清平太守好，
揀選皆言由至公。開元之末姚宋死，朝廷漸漸由妃子。
祿山宮中養作兒，虢國門前鬧如市。弄權宰相不記名，
依稀憶得楊與李。廟謨顛倒四海搖，五十年來作瘡痍。

切羽委

今皇神聖丞相明詔書纔下吳蜀平官軍又取淮

西賊此賊亦除天下寧年年耕種宮前道今年不遣子

孫耕老翁此意深望幸努力廟謨休用兵

唐書云初稹謫江陵與監

軍崔潭浚善長慶初潭浚歸朝出連昌宮詞等篇奏御

穆宗大悅即日拜祠部郎中知制誥遷翰林學士

曾

南豐云津陽門詩長恨歌連昌宮詞俱載開元間事微

之詞不獨富麗至長官清平太守好揀選皆言由至

公委任責成治之所興也祿山宮中養作兒號國門前
開如市險詖私謁無所不至安得不亂耶稹之叙事遠

子過二

望雲騅馬歌 并序

德宗皇帝以八馬幸蜀七馬道斃唯望雲騅來
往不頓貞元中老死天廐臣稹作歌以記之

憶昔先皇幸蜀時八馬入谷七馬疲肉綻筋攣四蹄脫
七馬死盡無馬騎天子蒙塵天雨泣巉岵道路淋漓濕
崢嶸白草眇難期詭洞黃泉安可入

白草詭洞並雒谷
中地名古諺云詭

洞入黃泉朱泚圍兵抽未盡懷光寇騎追行及嬪娥相顧倚
樹啼鷓鴣無聲仰天立圍人初進望雲騅形色顛顛衆
馬欺上前噴吼如有意耳尖卓立節踈竒君王試遣迴

胸臆撮骨鋸牙駢兩肋蹄懸四跼腦顆方胯聳三山尾
株直圍人畏誚仍相惑此馬無良空有力頻頻嚙掣轡
難施往往跳趨鞍不得色沮聲悲仰天訴天不遣言君
未識亞身受取白玉羈開口銜將紫金勒君王自此方
敢騎似遇良臣久悽惻龍騰魚鼈倬然驚驥盼驢騾少
顏色七聖心迷運方厄五丁力盡路猶窄橐它山上斧
刃堆望秦嶺下錐頭石五六百里真符縣八十四盤青
山驛掣開流電有輝光突過浮雲無朕跡地平險盡施

黃屋九九屬車十二纛齊映前導引驢頭

帝自奉天奔梁道險澀映

嘗為帝御會馬駭突帝命舍轡映曰馬奔蹏不過傷臣舍之或驚清蹕

嚴震迎號抱驢足

時震為山南西道節度使聞帝徙蹕馳表奉迎

路傍垂白天寶民望驢禮拜見

驢哭皆言明皇當時無此馬不免騎驟來幸蜀雄雄猛

將李令公收城殺賊豺狼空天旋地轉日再中天子却

坐明光宮朝廷無事忘征戰校獵朝迴暮球晏御馬齊

登擬用槽

殿中號乘輿之馬曰擬用槽

君王自試宣徽殿圍人還進

望雲驢性强步濶無方便分駿擺杖頭太高擘肘迴頭

項難轉人人共惡難迴跋潛遣飛龍減芻秣銀鞍繡韉
不復施空盡天年御槽活當時鄒諺已有言莫倚功高
浪開濶登山縱似望雲騅平地須饒紅叱撥長安三月

花垂草果下翩翩紫騮好千官煖熟李令閒

平朱泚之後天子既

厭兵患將臣生事而張延賞當國復與晟有隙勸帝奪其兵柄

百馬生獍望雲老望雲

騅爾之種類世世竒當時項王乘爾祖分配英豪稱霸王
主爾身今日逢聖人從幸巴渝歸入秦功成事遂身退
天之道何必隨羣逐隊到死蹋紅塵望雲騅用與不用

各有時爾勿悲

臣按此詩為李令公晟而作
用意深長與連昌詞並美

琵琶歌

寄管兒兼
誨鐵山

琵琶宮調八十一旋宮三調彈不出明皇偏許賀懷智
段師此藝還相匹自後流傳指撥哀崑崙善才徒爾為
瀕聲少得似雷吼纏絃不敢彈羊皮人間奇事會相
續但有卞和無有玉段師弟子數十人李家管兒稱上
足管兒不作供奉兒拋在東都雙鬢絲逢人便請送盃
盞著盡功夫人不知李家兄弟皆愛酒我是酒徒為密

友著作曾邀連夜宿中碾春溪華新綠平明船載管兒
行盡日聽彈無限曲曲名無限知者鮮霓裳羽衣偏宛
轉涼州大遍最豪嘈六么散序多籠撚我聞此曲深賞
竒賞著竒處驚管兒管兒為我雙淚垂自彈此曲長自
悲淚垂捍撥朱絃濕水泉嗚咽流鶯澀因茲彈作雨霖
鈴風雨蕭條鬼神泣一彈既罷又一彈珠幢衣靜風珊
珊低徊慢弄關山思坐對燕然秋月寒月寒一聲深殿
磬驟彈曲破音繁併百萬金鈴旋玉盤醉客滿船皆暫

醒自茲聽後六七年管兒在洛我朝天遊想慈恩杏園
裏夢寐仁風花樹前去年御史留東臺公私感促顏不
開今春制獄正捺亂晝夜推囚心似灰暫輟歸時尋著
作著作南園花折萼胭脂耀眼桃正紅雪片滿溪梅已
落是夕青春值三五花枝向月雲含吐著作施樽命管
兒管兒久別今方覩管兒還為彈六么六么依舊聲迢
迢猿鳴雪岫來三峽鶴唳晴空聞九霄逡巡彈得六么
徹霜刀破竹無殘節幽關鷓鴣軋胡雁悲斷弦若驕層冰

裂我為含淒歎竒絕許作長歌始終說藝竒思寡塵事
多許來寒暑又經過如今左降在閒處始為管兒歌此
歌歌此歌寄管兒管兒管兒憂爾哀爾哀之後繼者誰
繼之無乃在鐵山鐵山已近曹穆間性靈甚巧功猶淺
急處未得臻幽閒努力鐵山勤學取莫遣後來無所祖

古決絕詞

乍可為天上牽牛織女星不願為庭前紅槿枝七月七
日一相見相見故心終不移那能朝開暮飛去一任東

西南北吹分不兩相守恨不兩相思對面且如此背面
當可知春風撩亂伯勞語況是此時拋去時握手苦相
問竟不言後期君情既決絕妾意已參差借如死生別
安得長苦悲

御定全唐詩錄卷六十六